

Bédier 1938

I.

Or veul chanteir et soulaicier
et faire joie et renvoixier,
ke ne sai si loiaul mestier;
por ceu ne le veul jeu laissier.
Se ma douce amie
cui je ne hei mie
me veult faire aïe,
bien peux exploitier:
sa grant cortoisie
m'ait randu la vie,
maïx gent plain d'envie
m'en font aloignier.
Adès se poenent d'encuseir
ceuls ki bien aiment sens fauceir,
se s'en doivent moult bien gardeir
et lor compaignie eschueir.

II.

Je veul bien ma dame noncier
ke je seux tous siens sens trichier,
ne jai de li pertir ne quier;
adès veul estre en son dongier.
Trestoute ma vie
moinrai bone vie;
Fine Amor m'en prie,
ke m'i puet aidier.
je nel lairai mie
por la gent haïe;
lor grant velonnie
ne prixe un denier;
ne servent fors ke de jangleir
ne nuls hons nes doit escouteir;
ja por eaus ne larai l'ameir
ne ma grant joie a demeneir.

III.

Ke est malvais bien est chaitis;
il valt aisseis muels mors ke vis.
Proudons n'en iert jai entrepris:
adès croist et hauce ces pris.
Prouesce est loee,

malvestiés blamee,
gens desesperee
font adès lou pis.
Ma dame honoree,
ki a honor beie,
sa joie est doublee
nés en paradix.
Ki bien veult a siecle dureir,
si soit prous et saiche doneir
et loiaulment aint sens fauceir:
ensi puet sa joie fineir.

- letto 456 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/b%C3%A9dier-1938-5>